

Punca pencemaran dari kawasan industri di Negeri Sembilan - MB Selangor
Astro Awani
04 Oktober 2020
Ridauddin Daud

KUALA LUMPUR: Berdasarkan siasatan awal, punca pencemaran di Sungai Semenyih dan Sungai Langat berpunca dari kawasan perindustrian di Negeri Sembilan.

Menteri Besar Selangor, Datuk Seri Amirudin Shari berkata, usaha sedang dilaksanakan bagi membersihkan sumber air sekali gus memulihkan bekalan air secepat mungkin.

Beliau hadir melawat Loji Rawatan Air Sungai Semenyih pada Ahad malam dan turut disertai Menteri Alam Sekitar dan Sumber Air, Datuk Seri Tuan Ibrahim Tuan Man.

Sebanyak 274 kawasan dari empat wilayah akan mengalami gangguan bekalan air tidak berjadual selepas Loji Rawatan Air Sungai Semenyih dan Bukit Tampoi terpaksa dihenti tugas sepenuhnya.

Wilayah yang terjejas adalah Petaling, Hulu Langat, Kuala Langat dan Sepang yang bakal menjejaskan 309,687 akaun pengguna.

Ketua Komunikasi Korporat Pengurusan Air Selangor Sdn Bhd (Air Selangor), Elina Baseri berkata, penutupan loji tersebut terpaksa dibuat ekoran insiden pencemaran air mentah di Sungai Semenyih yang menjadi sumber air mentah ke loji itu.

“Air Selangor telah melaporkan insiden ini kepada Lembaga Urus Air Selangor (LUAS) dan tindakan untuk mengenalpasti punca pencemaran air mentah di sepanjang Sungai Semenyih dan anak anak sungai di sekitar Sungai Semenyih sedang giat dijalankan.

“Pihak Air Selangor telahpun mengaktifkan Pelan Tindakan Kecemasan (ERP) bagi menggiatkan bantuan kepada pengguna-pengguna yang terjejas ekoran insiden ini,” katanya dalam satu kenyataan pada Ahad.

Tambah beliau, pihaknya masih belum dapat menjangkakan tempoh masa pengoperasian semula loji dan pemulihan bekalan.

Dalam pada itu, LUAS menyatakan pihaknya mendapat laporan terdapat bau tidak normal seakan bau bangkai dikesan di Sungai Semenyih dan Sungai Langat.

Menerusi ciapan di Twitternya, LUAS memaklumkan bau itu dikesan kira-kira jam 4.30 petang pada Ahad.

Menurutnya, LUAS dan pihak terlibat sedang menjalankan siasatan dan tindakan mitigasi segera bagi mengatasi masalah itu.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/punca-pencemaran-dari-kawasan-industri-di-negeri-sembilan-mb-selangor-262167>